

蘭言偶錄上

番禺馮丈子良太守詢 己巳十一月

承示游青原山七古。用昌黎韻。兼效其體。自是合作。惟鄙意以閣下前詠七律。流水亦知宗派別。名山未許俗人來。一聯爲最妙也。初十日未刻。擬便衣小酌候叙。席惟張雪生胡雪香兩君耳。祈早臨勿却爲幸。

武進許士詢師珣

月前接惠書。緣筆墨冗煩。未卽裁答。歉甚。尊甫大人在襄陽。時有信否。瀛眷在江北者。今年曾得竹報否。念念。珣在此一切俱爲順適。惟精神大不如前。文理荒疎。日甚一日。每顧生徒滿座。不知何以教之也。吾弟舊業雖荒。而從前已經入門。亦不難於整理。又得甥館之托。只須省去泛應酬。自可用心書本。不必拘定時文。凡有關於文理者。留心學之。皆於時文有益。且在仕宦場中。總不免習氣嗜好之累。時親書本。時講文理。自然脫俗。不爲所侵矣。癸亥二月

昨譚甚囑。近作六首。探源名大家。仍不肯時趨。元魁可望。惟間有生澀處。就原本草草涉筆。歎甚。薄具菲儀。爲登龍之餞。還祈晒納。丁卯六月

番禺陳丈蘭圃京卿澧 丙子

前奉贈七言一首。聊以抒情。乃荷盛譽。媿甚。承示大集四卷。盥誦數過。贊歎不已。弟向來於朋好示觀詩集者。如真有佳處。輒取其精妙語入拙著識月軒詩話中。茲讀大集。美不勝收。衰病筆倦。只錄廿餘聯最精妙者。覽者亦可想見全豹矣。詩話寫於卷首請政。

全椒薛慰農太守 時雨

昨承枉談爲快。大稿奉題五古一首求教。明日請駕臨莫愁湖小酌。座有筱蘭敬甫。可以暢叙。新柳記題詞。閣下必有佳作。以先覩爲快也。

江陰何廉昉太守 斌

承示大稿一冊。拜讀數過。當于篇首加墨。凡數十條。並撰小序一篇。聊誌傾倒。另

奉贈聯句一付。均仍交雪子轉繳。弟春間如有暇。當至白門。屆時正可聯袂題襟。鬯叙一切也。

番禺葉蘭臺太史 衍蘭

拙作錄呈教正。題辭內請選取一首可也。兩詞意無甚區別。切勿並刻爲要。拙詞二本呈正。如蒙指疵。尤所欣感。

水雲樓詩贖。已刻入大著叢書中。鹿潭詞。將益齋寄來抄本。校正十餘字。浣青詩草。栖香詞送上。祈囑抄胥。幸勿污損爲禱。承惠綠槐書屋詩集。謝謝。

許久未晤。亟思一談。初十日敝處有度曲之會。請三點鐘便衣惠臨。鬯叙。勿却爲幸。

宜賓趙一臣大令 惟熙

前日蠟屐同遊。忻快无似。麻姑山水無大可取處。其奇處在龍門橋。及大夫松魯公碑。五老峰。諸處耳。神仙遊戲。生平所不喜道。且滄海桑田。安知非故作狡獪以

愚後來乎。詩中於此等處概從略。錄呈一紙。不識高明以爲然否。老兄興復不淺。必有新作。先此拋磚以當引玉。萬勿吝教是幸。丁卯三月

刻間晤談。一快積想。明日可否小作勾留。當携酒望湖亭。作盡日譚。定有佳句留題。頓令湖山生色也。奉上拙作二首。知不足當大雅一粲。庚午六月

金匱僉芝田大令敦培 丙子

花煥鶯初。驪歌唱徹。思君千里。夢轂爲勞。旋奉朶雲。並詞選一冊。辱承注念。雅想至深。感謝感謝。續接舍親來牘。知託寄之件。已於暮春收到。重勞柳毅。不誤洪喬。緜佩高情。曷其有極。藉悉駕落羊城。暮依笏節。鶴原有慶。驥路將騰。隔一嶺之梅花。懷人伊邇。傾三升之竹葉。醉我何時。驪望海天。雞鳴風雨。弟杜門奉母。滌硯呼兒。譜摺新聲。花銷英氣。半生如此。獨善何曾。不足爲知己道也。

善化何鏡海觀察 應祺 丙子

十年流水。奉到朶雲。似明月之投懷。彌望風而馳想。藉悉文旌遠駕輪船。行抵廣